

ՆԵՐՔԻՆ ՏԵՍՈՒԹԻՒՆ

ՅՕԹԵԼԵԱՆԱԿԱՆ ՄԱՍՆԱԺՈՂՈՒԻ ՈՐՈՇՈՒՄԸ

Երէկ, մայիսի 17-ին, առաջնորդարանում նշանակված էր Մեսրոպ եպիսկոպոսի երկրորդ հրաւեր-ժողովը այն անձանց, որոնք մասնակցել էին ապրիլի 22-ի ժողովին յօբելեանական յանձնաժողովի ընտրութեան առիթով: Հրաւերի մէջ ասված էր, որ ժողովը հրաւիրվում է կատարելու լրացուցիչ ընտրութիւն՝ ի տեղի հրաժարված 5 անձանց: Հրաւերներ ուղարկված էին նաև Թիֆլիսի յօբելեանական մասնաժողովին, «Մշակի», «Արօրի», «Տարազի» խմբագրութիւններին, վաճառականութեանը ի դէմս աւագի և այլոց:

Այս գործի և տեղի ունեցած միջադէպի մանրամասնութիւնները յայտնի են հասարակութեանը: Յայտնի է և այն, որ Վեհ. կաթողիկոսը դեռ չը հաստատելով գոյութիւն ունեցող յանձնաժողովներից ոչ միւնը, ինչպէս և ապրիլի 22-ին ընտրվածը, հրամանագրել է Մեսրոպ եպիսկոպոսին ժողով գումարել միայն երկու յօբել. մարմինները, սակայն, չը գիտենք ինչ, ու, հարկ է համարվել նորից նախկին ձևով վարվել:

Արդ, Թիֆլիսի յօբելեանական մասնաժողովը (բաղկացած 40 հոգուց, շ. Առաքելեանի նախագահութեամբ), ախիս 16-ին նիստի գումարվելով, կայացրեց մի որոշում, որ յայտնեց անմիջապէս առաջնորդին:

Ահա այդ գրութիւնը.
«Ձերդ» Սրբազնութիւն,
«Հանդէպ ձեր շրջաբերական հրաւերին՝ գալ առաջնորդարանում կայանալիք վաղվայ ժողովին, գրեթէ գիւտի 1500-ամեակը և տպագրութեան 400-ամեակը տօնելու նպատակով ապրիլի 22-ի ժողովով ընտրված յանձնաժողովի անդամների թիւը լըրացնելու համար, ի տեղի հրաժարվածների, նոյն նպատակով վաղ արդէն ընտրված մասնաժողովը, համաձայն իր այսօրվայ նիստում կայացրած որոշման, գալիս է ներկայիս հետեւալը պատասխանելու.

«1) Մասնաժողովը իր նախորդ երկու գրութիւններով առ ձեր սրբազնութիւնը պարզ ու որոշ գրել էր իր պայմանները, որոնցով պատրաստ էր նոյնպէս վաղ արդէն ընտրված մի յանձնաժողովի հետ միացեալ նոր յանձնաժողով կազմել՝ երկուստեք հաւասար թւով ընտրվածների, և գործել ձեր նախագահութեան ներքոյ և ըստ ամենայնի համաձայն Վեհ. կաթողիկոսի կօնդակի պարունակութեան: Ապրիլի 22-ի ժողովը մասնաժողովի պայմանները լրիւ չընդունեց, թողեալ դեռ այն հանգամանքը, որ մինչ նա ներկայացնում էր յանձնաժողովը իր ընտրողներով հանդերձ, մասնաժողովը ինքը միայն էր ձեր սրբազնութիւնից հրաւեր ստացած առանց իր ընտրողներու Այդ հանգամանքը խախտեց երկուստեք հաւասար թւով ընտրվածներ ունենալու պայմանը: Ուստի 22-ի ժողովով ընտրված 15 հոգուց 5-ը, որոնք մասնաժողովի կազմին էին պատկանում, հրաժարվեցին: Արդ, 15 թիւը լրացնելու համար դուք նոր ժողով էք հրաւիրում՝ զարձեալ նախորդի հանգամանքով:

«2) Մասնաժողովս այդ հանգամանքը խախտումն է համարում արդարութեան և հաւանութեան գալ կարող չէ. նա, մնալով հաստատ իր յիշատակեալ գրութիւններին, դիմում է սրբազնութեանդ բարեհաճ հոգացողութեանն և յայտնում է հետեւալը. երբ մասնաժողովը ձեր կողմից կը ստանայ տեղեկութիւն, թէ յանձնաժողովը ընտրել է իր ներկայացուցիչներին նոր խառն յանձնաժողով կազմելու համար, ըստ մտաց Վեհ. կաթողիկոսի հրահանգի, ինքն ևս անյապաղ իր ներկայացուցիչները կընտրէ հաւասար թւով՝ միւսների հետ ձեր նախագահութեան ներքոյ գործելու»:

Նոյնպէս «Մշակի», «Արօրի» և «Տարազի» խմբագրութիւնները յայտնել են, որ հնարաւոր չեն գտնում մասնակցել այս նոր ժողովին, քանի որ իրանց նախկին պայմանները չեն ընդունված:

Մեզ հաղորդում են, որ նաև վաճառականների աւագը հնարաւոր չէ գտել մասնակցել ժողովին: